

13. maj 2014

UPA 2014/153
Per Berthelsen

Kalaallit Nunatsinni ilinniarfinni tamani ilinniartut pisariaqartitsineq naapertorlugu danskisut pikkorissarneqarnissamik periarfissinneqaqqullugit Ilinniartitaanermut Pilersaarutaat II-mut Naalakkersuisunit qulakkeerneqaqqullugu Inatsisartut aalajangiiffigisassaattut siunnersuut.
(Inatsisartunut ilaasortaq Mimi Karlsen, Inuit Ataqatigiit)

Inatsisartunut ilaasortaq Mimi Karlsen, Inuit Ataqatigiinneersoq aalajangiiffigisassatut siunnersuuteqarluni Ilinniartitaaneq pillugu pilersaarut II-mut atatillugu nunatsinni ilinniagaqartut immikkut danskit oqaasiinik piginnaanngorsarnissamik pisariaqartitsisut qulakkeerinniffigineqarnissaat siunnersuutigaa.

Mimi Karlsenip siunnersuuteqarnermigut nunatsinni ilinniarnerminnik ikerinnarmi unitsitsiinnartartut amerlanerat tunngavilersuutigaa, iliuuseqarnikkullu ullumikkornit danskit oqaasiinut sanngiiffillit ajornannginnerusumik danskit oqaasiinik atuinermut pikkorinneru-lersinnaanermut periarfissinneqarlutik ilinniakkamik ingerlatsinissamik periarfissaqarsin-naaqqullugit, soorluttaaq taamaaliornikkut ulloq manna tikillugu periusaasup, tassalu danskit oqaasiinik inaarutaasumik misilitsinnermi minnerpaamik 6 angusimannigikkaanni ingerlaannartumik ilinniagaqarsinnaanermut itigartinneqartarneq qimanneqarsinnaaq-qullugu.

Siumup siunnersuuteqartoq tassuunakkut isumaqatigaa, tassami ilinniarfinni piumasaqaat siuliani taaneqartoq nunap nammineq oqaaserisaanut atortinneqannginnera paatsuunga-nartutut isigineqarsinnaammat.

Ilinniakkat ilaannut tunngatillugu danskit oqaasiinut piginnaasat minnerpaaffilerneqar-tarnerat Siumut paasisinnaavaa, taamaammallu pisariaqartitsineq taamaattoq nunatsinni ilinniarfinni tamani – minnerunngitsumik qaffasinnerusumik ilinniarfinni – atuutinngitsoq Siumut isumaqarluni.

Taamaammat aallaqqaammut ilinniarfiit tungaanniik sapinngisamik piaarnerpaamik danskit oqaasiinik pikkorissaasarneq qanoq inuiaqatigiinnut inuusuttortatsinnullu iluaqutaati-gisinnaanera misissorneqassasoq Siumup kaammattuutigiumavaa.

Pisariaqartitammi aalajangersunik suussusilerlugillu iliuutsivut tassunga sammititamik aqqissuteqarfigigutsigit, taava iliuusissatut pilersaarut pitsaanerungaartoq qulakkeersinnaassavaput, taamaalillutami tamanut sammisumik iliuuseqarnata, ajornartorsiummut tunngasorpiaannaat iliuuseqarfigisinnaalissagatsigit.

Taamaammat Siumup siunnersuut tunngaviusumik taperserpaa, taassumalu Kulturimut Ilinniartitaanermullu Ataatsimiititaliamut ingerlateqqinneqarluni aappassaaneerinnineq pilersinnagu, oqaaseqaatit siuliani saqqummiunneqartut aallaavigalugit suliaq misissorluarlugu suliarisinnaassammagu.